



**ACORDO DE COLABORACIÓN ENTRE A CONSELLERÍA DO MAR DA XUNTA DE GALICIA E
A AXENCIA PARA A MODERNIZACIÓN TECNOLÓXICA DE GALICIA (AMTEGA)**

MEMORIA XUSTIFICATIVA

Mercedes Rodríguez Moreda, directora xeral de Pesca, Acuicultura e Innovación Tecnolóxica da Consellería do Mar, **DECLARA:**

Que esta Dirección Xeral de Pesca, Acuicultura e Innovación Tecnolóxica formalizou coa Axencia para a Modernización Tecnolóxica de Galicia (AMTEGA) o instrumento convencional arriba referido por un período de vixencia que abarcou dende o 23 de setembro de 2016 até o 15 de decembro de 2018.

Que o instrumento convencional tivo por obxecto:

Establecer as bases de colaboración entre a Consellería do Mar e a Axencia para a Modernización Tecnolóxica de Galicia (AMTEGA) para o financiamento de sistemas de información vinculados á xestión pesqueira para a promoción, mellora da comercialización e da trazabilidade dos produtos pesqueiros.

As accións específicas que se realizaron derivadas deste obxecto son as que seguen:

- Proxecto 1. Portal de difusión das políticas financiadas polo Fondo Europeo Marítimo e da Pesca para o período 2014-2020 (Regulamento (UE) nº508/2014). Esta plataforma web permitirá divulgar e fomentar as actividades do FEMP na Comunidade Autónoma de Galicia, xestionadas pola Xunta de Galicia a través da Consellería do Mar. A partir do portal permitiuse amosar as axudas, facilitando a divulgación e comunicación, noticias e documentación e marco normativo asociado. O proxecto incluíu a creación e implantación dun portal e a ferramenta de xestión de contidos asociada (CMS) que permitiu a súa operativa e actualización de contidos. Comprende así mesmo o soporte de dito portal durante o período de vixencia do presente acordo, así como a formación inicial do mesmo.
- Proxecto 2. Soporte e mantemento evolutivo da aplicación de xestión de autorización de primeira venda de conxelado (AVEMAR), que xestiona as autorizacións de primeira venda que aplican a aqueles establecementos produtores dos sectores da pesca conxelada e acuicultura que non venden os seus produtos a través dunha lonxa ou centro de venda autorizado, afectando aos procedementos de autorización, prórroga, extinción e modificación de datos. O traballo dou soporte a melloras e liñas de actuación xa identificadas conxuntamente pola Consellería do Mar e Amtega, así como ao soporte





técnico e de usuarios e xestión tecnolóxica asociada do proxecto durante a vixencia do presente acordo.

- Proxecto 3. Análise e desenvolvemento inicial dunha aplicación de xestión WEB que facilite a xestión dos mecanismos previstos na Organización Común de Mercados (OCM) dos produtos da pesca e da acuicultura en Galicia, así como o mantemento das denominacións comerciais asociadas. En particular, o obxecto era facilitar a xestión do funcionamento e relación das Organizacións de Produtores Pesqueiros de Galicia (OPP-Galicia) coa Consellería do Mar, como organizacións esenciais para a correcta aplicación da OCM.
- Proxecto 4. Rexistro Integral de Acuicultura e Sistema de Xestión de Acuicultura (SXA). Sistema de apoio na tramitación da xestión dos procedementos relacionados cos establecementos de acuicultura: concesións, autorizacións, outorgamentos, prórrogas, traslados e habilitacións. Tívoise en conta como sistemas legacy de partida o Sistema de Xestión de Procedementos Administrativos (SXPA) o actual aplicativo de Xestión de Cultivos Mariños (GCM), así como a integración con outras bases de datos existentes. Como parte do proxecto creouse tamén un novo Rexistro de Acuicultura, no que se volcou a información de GCM, e no que se permitiu a xestión das altas, modificacións e extincións de rexistros, así como as buscas, listados e consultas que se definiron.
- Proxecto 5. Desenvolvemento evolutivo da Plataforma Tecnolóxica da Pesca, permitindo o desenvolvemento de melloras e novas funcionalidades previstas entre as que se pode mencionar: soporte e mantemento evolutivo das ferramentas de xestión de pesca fresca e pesca conxelada, cambios nos sistemas de recollida de información de acuicultura (entre outros, integracións dos parques de cultivos, novos documentos de trazabilidade, unificación telemática de documentos de rexistro e notas de venda), modificacións na aplicación de alternancia de artes, adaptación da PTP para dar cabida aos documentos que se vaian ampliando en canto a tipoloxía como alcance, así como modificacións motivadas pola posta en marcha polo Ministerio de Alimentación, Agricultura e Medio Ambiente do proxecto Trazapes.
- Proxecto 6. Ampliación de funcionalidades e adaptación para a integración da Marca PescadeRías en depuradoras e comercializadores. Desenvolveuse unha funcionalidade on line que incluíu o etiquetado de produto dende a plataforma e unha funcionalidade mixta para o procesado dos datos en local e sincronización coa plataforma. Integráronse os documentos de rexistro en depuradoras para a súa validación telemática e recuperación da información asociada aos mesmos.





- Proxecto 7. Xestión do etiquetado individual de PescadeRías en lonxa. Desenvolveuse unha aplicación mediante a identificación e xestión da marcaxe individual, co obxectivo de que o consumidor final poida consultar a información de trazabilidade do produto adquirido. Realizouse un proceso de asignación de etiquetas e de envío de datos.

Que existiu converxencia de intereses entre as entidades asinantes en orden á consecución do obxecto referido.

Que o instrumento convencional que se asinou se fundamentaba no que segue:

Que a Consellería do Mar ten entre os seus obxectivos prioritarios a potenciación, difusión e promoción dos sectores e produtos pesqueiros galegos, co fin de intensificar o coñecemento dos mesmos e incrementar así a súa competitividade. Neste senso, o desenvolvemento de sistemas de información redunda nunha xestión máis eficiente do sector pesqueiro, tanto no relativo a unha produción máis sostible, como a unha boa comercialización, unha mellora na trazabilidade dos produtos e un incremento da seguridade alimentaria.

Que, segundo o artigo 6 do Estatuto da Axencia para a Modernización Tecnolóxica de Galicia, aprobado polo Decreto 252/2011, do 15 de decembro, a AMTEGA ten entre as súas competencias, a dirección e xestión de todas as actuacións da Xunta en materia de tecnoloxías da información e as comunicacións e o deseño e liderado de iniciativas que contribúan a impulsar o desenvolvemento da sociedade da información en Galicia, garantindo os dereitos dos cidadáns e eliminando as barreiras que se opoñan á expansión e ao uso das novas tecnoloxías.

Que os intereses converxentes das partes asinantes excluían o ánimo de lucro, e non podían satisfacerse axeitadamente mediante a celebración dun contrato dos contemplados no Texto Refundido da Lei de contratos do sector público, aprobado por Real decreto legislativo 3/2011, de 14 de novembro, ou doutro instrumento alleo á natureza estritamente convencional.

En atención ao exposto, e a fin de dar cumprimento ao preceptuado no artigo 15.2 da Lei 1/2016, de 18 de xaneiro, de transparencia e bo goberno, estimouse xustificado o recurso á sinatura do instrumento convencional que se pretendía, con exclusión doutras figuras.

E para que conste, asínase esta memoria, en Santiago de Compostela

